



Kabarett „Sachsenmeyer & Co.“  
09224 Chemnitz  
Feenweg 11

Hauptspielstätte:  
Kabarett-Kiste (im Hedwigshof)  
An der Markthalle 8  
09111 Chemnitz

Bestell-Telefon: 0371 - 694 77 11  
[www.sachsenmeyer-kabarett.de](http://www.sachsenmeyer-kabarett.de)  
e-Mail: sachsenmeyer@t-online.de

#### 44. Kalenderwoche – ab 25. Oktober 2008

## Die wolln mei Schbarbuch reddn!

Finfhunnord Milljardn fiehr de Bankn! Damid die nisch grachn gehn! Dor Schdaad will mid alle Middl vorhindorn, dass mei Schbarbuch fleedn gehn dud. Odor ooch Ihrs! Ja, unsor Schdaad vorsuchd uns jedzde vor dähn Finanzhyjähn und Börsnhaie zu schidzn. Das is doch werglisch nedd von die!

Guhd, die häddn nadiehrlich mid dem Schidzn e bißl friehor anfang kenn, nisch erschd jedzde, wo de Kagge am Dampf is. Isch meene, das had doch jedor gesähn, dass die in die Bankn in de eischnen Daschn geschaufl d hamm, dasses nisch mähr feiorlich war.

Nee, es mussde ehm erschd een rischdischn Gnall gähm, e Ährdbäbn, bevor jemand sisch gedraud had zu sachn, dass dor Gabidalismus vor laudor Gier dabei is, sei eischnes Grab zu schaufln. Isch meschde ma wissn, was sein däde, wenna jedzde noch das sozjalisdische Lachor gähm däde?

Nee, die missn jedzde de Bankn reddn, damid de Wirtschafd keen Schadn nehm dud und damid de Schbarbieschor sischor bleim. Un se sachn ja ooch, dass sischor sinn. Das is so, wie wose erzähld hamm, dass de Rendn sischor sinn.

Abor mid die Banken isses eischendlich wie mid dor Gulduhr... da duhn sisch welsche Jahr um Jahr digg un dähmlisch vordiehn... un dann irschendwann is de Binke alle. Un nu muss dor Schdaad ran odor de Gommuhne un muss neues Geld ranschaffn, damid die, die schon immor abgesahnd hamm odor weidorhin absahn könn. So is das. Un das is rischdisch so. Daderfiehr is ja dor Schdaad erfundn word. Dor Schdaad dud de Schuldn, die die machn, die de Machd hamm, off alle vordeeln.

Un dann dud dor Schdaad ehm dadervor sorschn, dass die, die schon immor abgesahnd hamm, nisch bledzlich mid ihror Hände Arbeit fiehr ihre eischne Egsistenz sorschn missn. Nee, es gibbd immor welsche, die wie unnor Nadurschutz schdehn dun. Unnor Schdaadsschutz - sozusachn. Ooch ehm so de hohe Gulduhr. Also, die Gulduhr, die mid dor Machd vorbandelnd is. Nisch so e kleenor Schrifdschdellor, dähr vorsuchn dud, de Lideraduhr zu reddn, dähr was schreim will, was werglich was mid Lideraduhr zu dun hamm kennde. Odor e Malor, dähr werglich Kunsd maln un nisch bloß Rumleggsn will. Odor annre kleene Fische... - nee, die dun nisch unnor Schutz schdehn. Wenn die vorhungorn missn, da heeßd es, dass die ja keenor zwing dud, zu Schrifdschdellorn odor zu Malorn! Se kenndn doch ooch arbeitn gehn.

Nu sachn se das ma dähn Leidn vom Obornhaus! Odor vom Dheador. Se solldn doch sähn, wiese selbor zu Gelde komm. Da däde abor e Gekreische losgehn! De Gulduhr... de Gulduhr...

Nee, das is in dor Gulduhr wie in dor Wertschafd... - so kleene Bedriebe die gehn gnadnos in de Bleide... die großn, die wern mid schdaadliche Middl sanierd. Oder ehm jedzde de Bankn!

Ich weeiß nisch, was das mid dor Margdwertschafd zu dun hamm soll?

**Eduard Sachsenmeyer**